

太上經戒

力四

十戒

玉清經本起品云道言昔元始天尊與諸賢聖億億萬眾處處周旋最後下觀素賢世界有一國王名曰德正直利根辯慧為眾生故

而為導首通告國內臣民男女言今得太平天下無事火災消滅兵刃不起百穀成熟皆由道恩非自然也何以報道罔極之恩唯當傾心盡意恭敬供養造立宮觀香花燈燭晨夕禮誦齋戒悔過以求福祐於是天尊命巨靈仙人而告王曰子為一國之主天下所推凡聞之貴不先於此但以正法治化不在人氏亦足功德上天何煩秘要秘要之道卒難可聞然秘要之階不過慈善慈善之法不違科戒戒有種種人亦多品上品之人身先無犯亦無所持中品之人心有上下觀境即變以戒自制不令放逸如此之人或受十戒五戒以自防護下品之人惡心萬般難可禁制下品之中復有二品上品者身欲奉戒或受一百九十九戒或受觀身三百大戒或受千

二百威儀之戒以自防保令無越逸下品者身同禽獸雖有人形而無人心縱受其戒終無所益今且受第二中戒十種科禁入道初門諸人聞說歡喜打蹈悉皆俯伏而奉戒言天尊告曰

第一戒者不得違戾父母師長及逆不孝第二戒者不得殺生屠宰割截物命第三戒者不得叛逆君王謀害家國第四戒者不得淫亂骨肉姑姨姊妹及他婦女第五戒者不得毀謗道法輕泄經文第六戒者不得汚漫靜壇單衣裸露第七戒者不得欺凌孤貧奪人財物第八戒者不得裸露三光猷棄老病第九戒者不得耽酒任性兩舌惡口第十戒者不得兇豪自任自作威利

右此十戒當終身奉持

大戒上品并序

上品經云太極仙公於天台山靜齋念道稽首禮拜請問太極法師徐來勒曰弟子有幸得侍對天尊自聞微言彌綸萬劫洞觀道源過泰之歡莫有諭也願玄少好神仙白日飛

騰之道必想上聖恒以髮鬚大經微遠妙贖難通將稟口訣釋我冥津洞暢虛漠有無都盡矣迎而未究人生宿世因緣本行之由今願天尊覺所未悟是時太上玄高真人嘯咏步虛洞章歡然含豫輝金顏而言曰子以累劫念道致太極玉名寄慧人中將獨步玉京超逸三界巍巍乎太上仙公之任矣故慈心於天人念度於後學也常以外身濟物有德而弗名玄都所詮諒不虛矣而謂大極真人曰卿受太上虛皇道君之教為其師保亦必盡教以高上大洞之淵曠也宜俟彼多陳手吾受任忝為都教之法師至於執卷由子矣太極真人答曰此童真之人名刊金簡才質清遠景秀太上玄微洞虛故當為仙公之任弘道大度者也吾忝受教化愧不足為彼宗匠太上有命何敢不傾軀哉衆妙之統仰賴於法師矣太極真人又曰夫道無也彌綸無窮子欲尋之近在我身乃復有也因有以入無積念以得妙萬物芸芸譬於幻耳皆當歸空人身亦然身死神逝喻之如屋屋壞則人

不立身敗則神不居當制念以定志靜身以安神實氣以存精思慮無忘冥想內視則身神並一身神並一近為真身也此實由宿世本行積念累感功濟一切德廢萬物因緣輪轉罪福相對生死相滅貴賤相使賢愚相傾貧富相欺善惡相顯其苦無量皆人行願所得也非道非天非地非人萬物所為矣正由心耳此對既鍾亦難脫也弱喪之徒信道者少宿命者多不積善定念修德理身而欲忽德忘身強求外物其可得哉既已不刻莫不傷身矣故有道之士取諸我身無求乎人道言修身其德乃真斯之謂也夫學道不受大智慧道行本願上品大戒無緣上仙也子有宿命是以見此經其文隱秘立信效心然後而傳不可妄示不信必發異念異念既生彼此獲罪是故藏之於無待有應為仙王者乃告焉是時雲龍踊躍詣天散華飛香奏煙山海靜波觸類窺然鬼魅消亡神魔降伏五苦俱解長離地獄惡者返善信順受福爾乃命太極侍經仙人劉文靜披雲韞而授經也太

極真人曰宿世禮奉經師口誦身行布施厄困願樂三寶君親忠孝遠慕山水栖懇賢儒虛心有道燒香散華護度一切修道補過信順宿命靜思忍情其行也上可昇仙度世下可輪轉富貴生為人尊容貌偉秀才智清遠為入之道莫不具足夫居世富貴笑於貧賤今報以貧賤居世好殺今報以傷殺居世輕易笑於醜陋今報以醜陋居世聰明不教於人今報以頑塞居世常康笑於困病今報以滯疾居世不信道笑於經教今報以下愚長與道隔女人居世奪人壻者今報以少寡男子居世誘人婦女今報以鯨獨居世發心為夫妻而後世不得俱生人道死為鬼魅今報以本念成於邪病自非大法莫有解其宿纏而消此邪病矣夫為父母兄弟姊妹夫妻君臣師保朋友皆先世所念願為因緣展轉相生莫不有對者哉故曰倚伏難窮矣唯學仙道士當兼忘因緣絕滅生死同歸乎玄以入妙門能知是者始可與言學道之本也若見居家妻子富願一切早出愛慈攝意奉

戒

若見飲酒當願一切制於命門以遠禍亂
若見彩女當願一切守情忍色志慕賢貞
若見淫人當願一切除棄邪念翹心禁戒
若見婦人當願一切忍割浮華樂道自娛
若見真人當願一切履信正化日入法門
若見眾人當願一切推仁無爭懷道安世
若見善人當願一切時刻存念仰軌其道
若見惡人當願一切棄凶即吉不犯王法
若見貧人當願一切損身施惠後受大福
若見富人當願一切救濟萬物世世受祿
若見貴人當願一切承其教旨悉令典訓
若見賤人當願一切勤修匪懈各得所為
若見帝王當願一切奉仰王道孝如父母
若見主相當願一切受其教制四方歸仁
若見兵甲當願一切各念仁心天下讓賢
若見王子當願一切日歌太平係國承家
若見賢人當願一切履行其德道為世宗
若見法師當願一切明解法度得道無為
若見棲山道士當願一切悉見法門速得昇

仙

若見教化當願一切親受聖教皆為淵博
 若見聖人當願一切尊禮侍見諸國並瞻
 若見仙人當願一切真道悉成飛昇天堂
 若見城郭當願一切嚴整修飾以道為基
 若見大國當願一切歸宗慕德若水注海
 若見小國當願一切知止虛沖安其所居
 若見市朝當願一切群賢雲萃悉弘正道
 若見靜觀當願一切功德巍巍天人得道
 若見齋戒行香當願一切道德日新序序雅
 正。

若見誦經當願一切盡上高座咸聞聖音
 若見經教當願一切各各受讀禮習普行教化
 若見樓觀當願一切洞觀十方無所隱藏
 若見高山當願一切智思無量輔成家國
 若見栖憇茂林當願一切安居自在廢底舍
 識
 若見好學當願一切得成師宗養徒敷教
 若見淨手當願一切常執經書無待暫輟

若見善口當願一切耽味洞經日新不厭
 若見動足當願一切超步三界飛行上清
 若見靜止當願一切滅景停真安閑空寂
 若見飲食當願一切棄累入淨存得道味
 若見大藏當願一切除其災害施為福田
 若見疾病當願一切以道自安免此苦厄
 若見死喪當願一切學道常存濟度三徒
 若見畋獵當願一切不為始終入為無罪
 若見夷狄當願一切得生中國不生邊地
 若見少年當願一切及時學問遂成學名
 若見老病當願一切以道攝生不更衰老
 若見三光當願一切晉明靈曜閭冥即消
 若見雲雨當願一切惠澤盈溢無所不宜
 若見素雪當願一切常居潔白道遠自在
 若見靈風當願一切輟懷披散德流遐邇
 若見淨水當願一切洗垢清虛平等其心
 若見名香當願一切受茲芳淨眾穢肅然
 若見好華當願一切樂散諸聖相好具足
 若見車馬當願一切得道無為乘鳳駕龍
 若見絃歌當願一切說經歎法以道娛樂

若見福食當願一切無不飽滿世享天厨德
 流後人如水歸海宗廟稟長常居貴盛世與
 四輩俱生王家

若見散施當願一切禍滅九陰福起十方德
 如山海莫不興隆七祖生天子孫賢忠富貴

巍巍所欲皆從學道飛仙駕雲乘龍道士坐
 卧常願我等四大令德同體道真長存玄都
 師友自然濟度十方天下受恩道遙無為洞
 觀妙門

禮經祝三首 真人口訣云侍經仙童玉女聞
 此祝皆歡喜而祐其身也是大
 經悉用此祝而禮拜矣若冥心禮經
 者亦心祝其文乃上仙之秘祝也

樂法以為妻愛經如珠玉持戒制六情念道
 遣所欲淡泊正氣停蕭然神靜嘿天魔並敬
 護世世受大福

第二首

鬱鬱家國盛濟濟經道與天人同其願縹緲
 入大衆因心立福田靡靡法輪昇七祖生天
 堂我身白日騰

第三首

大道洞玄虛有念無不鍊質入仙真遂成
金剛體超度三界難地獄五苦解悉歸太上
經靜念稽首禮

太極真人曰學昇仙之道當立千二百善功
終不受報立功三千白日登天皆濟人應死
之難也施惠其人尤善矣學道當令衆行合
法廣建福田發大慈之心動靜常起道意能
如是也吐納服藥佩符讀經精進終身不倦
豈有不得仙乎人無此德雖服藥佩符讀經
齋戒故終命而不驗矣學士明思要言太極
真人曰立三百善功可得長存地仙若一功
不全則更從一始而都失前功矣常有其念
在於心膂者則是也若導人作善即為善功
也太極真人曰常念嘯誦洞經修行大慈先
人後身揚善化惡斷絕衆緣滅念守虛心如
太玄為道是求始謂能言神仙之道也太極
真人曰吾受昔太極智慧十善勸助德戒於
高上大道虛皇世宗奉修行大法度人甚
易此自然之福也太上以普教天人令各得
本願始入法門長存無為不受十苦八難罪

對罷散地獄休息三官日日寧閉世世榮樂
咸脫羅網後生安泰天性恬然所願隨其得
戒如上以傳賢信

十善勸戒曰勸助禮敬三寶供養法師令人
世為君子賢孝高才榮貴巍巍生為人尊門
族昌熾三寶者謂道經師也能養生
戒曰勸助治寫經書令人世世聰明博聞妙
蹟恒值聖世見諸經教能誦章句
戒曰勸助建齋淨治令人世世門戶高貴身
登天堂飲食自然常居無為
戒曰勸助香油眾供令人世世芳盛香潔光
明容貌絕偉天姿高秀
戒曰勸助法師法服令人世世閑雅道遙中
國不墮邊夷男女端正冠冕玉珮稱諸身飾
戒曰勸助國王父母子民忠孝令人世世多
嗣男女賢儒不受諸苦
戒曰勸助齋靖讀經令人世世不墮地獄即
昇天堂禮見眾聖速得返形化生王家在意
所欲玩好備足七祖同歡善緣悉備終始榮
樂道法轉至將得仙道

戒曰勸助衆人學經令人世世才智洞達動
靜威儀常為人師
戒曰勸助一切布施諫諍善事令人世世壽
考富樂常無怨惱

戒曰勸助一切民人除嫉去欲履行衆善令
人世世安樂禍亂不生病者自愈仕官高遷
為衆所仰莫不吉祐門戶清貴天人愛有神
魔恒護常生福地
太極真人曰人之行惡莫大於嫉殺貪奢驕
姪也若此一在心伐兩年命矣挾之以學神
仙者不亦悲乎
太霄琅書十善十惡
十善既行十惡自息惡行善大慈德成是
以上品戒云卹死度生救疾治病施惠窮困
割己濟物奉侍師主營建靜舍書經校定修
齋念道退身讓義不爭功名宣化愚俗諫諍
解惡邊道立井植種果林教化童蒙勸人作
善施為可法動靜可觀教制可軌行常使然
十善通行謂之道士不修善功徒勞山林能
信斯旨勤尋諸戒戒部甚多隨緣所得無數

諸戒無央科律皆輔一神攝於三業三業者口身心也運動造作善惡無量無量善惡十為惡端一者妄言二者綺語三者兩舌四者罵詈此四口惡返之則善五者貪愛六者竊盜七者姦姪此三者屬身八者嫉妬九者恚瞋十者邪癡此三者屬心心業最重為十惡根斷絕十惡修十善本實言直語通和講誦謙讓捨財內外貞潔慶讚懽喜敬信三尊備此十善十惡永除

思微定志經十戒

一者不殺當念衆生二者不姪犯人婦女三者不盜取非義財四者不欺善惡反論五者不醉常思淨行六者宗親和睦無有非親七者見人善事心助歡喜八者見人有憂助為作福九者彼來加我志在不報十者一切未得道我有不望經云時有十二年少處世間樂日日相就共作好食酣飲嬉戲或復論議持戒之難易天尊以道眼遙見此人前世曾為人師而秘懷經典逮諸弟子於道之心亦復猶豫因此微緣猶可度耳於是

天尊化作凡人從會中過託之乞食因悉共語諸年少輩復論如初中一人曰我數隨兄至安樂山見諸道士悉持十戒肅肅其佳泊至於死魂神所在亦當不虛但其十戒人持難悉從耳化人曰持此甚易違此甚難諸人問化人曰云何持戒則易不持返難化人曰立身如戒上不畏天子亦不畏鬼神何謂之難違戒之者悉畏之是難也其中一人曰餘戒可持惟酒難斷所以者何我先服散散者發之曰非酒不解是故難耳化人曰散發所須此乃是藥將養四大藥通可通但勿過量耳一人曰餘事即可安語其難所以者何若有密事在尊長前應為隱諱而人見問不得欺欺即犯戒是故為難化人曰事有隱諱而人見問不得欺欺即犯戒是故為難化人曰事有隱諱理有方便此亦可通但勿善惡返論說其長短耳一人曰餘戒即可唯盜戒難小小之間以挂犯目化人曰大事實難小小之間益可慎之而說偈曰
何不受盜戒 不受盜亦難 孰云闇昧中

中有記盜官 取一年年倍 倍倍殊不寬 以手捧銖銅 燒口煮心肝 一朝言此苦 終年猶心酸 何不受此戒 保持必令完 我信彼亦信 在在無不安 安坐招靈人 永享長年歡
一人曰餘戒悉易淫最難斷所以爾者我曾履斯事數隨兄中食當中食時自云一日精進無不過理亦謂身後當得此齋戒之福至是夕夜是我所懲輒來狡獪雖苦加抑迨不覺已爾每每如此是知最難化人曰色者是。想爾想悉是空何有色耶但先自觀身知身無寄便知無色何可不忍且淫慾頗恣如飲鹹水飲多渴多唯死而已何有厭足而說偈曰
色慾劇於渴 小忍差何度 何為進鹹水 水鹹益渴故 子能善解渴 當飲天甘露 甘露香且薰 通體皆流布 天人尋香降 玄趣自然悟 熙熙永無為 長保九天祚 一人曰餘悉可從唯熱難戒所以者何我好散雜一食無難了自無味數日便瘦化人曰

賢者肥為人患瘦即體輕用肥何為即說偈曰

賢賢戒其熱 亦無懷熱想 眾生雖微微

亦悉樂生長 如何害彼命 而用以自養

自養今一時 累汝自然美 長淪三塗中

辛苦還復往 善惡各有緣 譬如呼有響

何不改此行 慈心以自獎 真人攜手遊

逍遙雲景上

說此偈已化人見大威變極道之姿侍從僚

屬鈞天大樂非可目名返於上方諸人悉見

喜懼交集并聞要說意解開悟俱登道果

妙林經二十七戒

元始天尊告諸四眾一切眾生貪著有為欣

生惡死意雖求生由造死業不持戒行假使

長壽猶如老樹有何殊別若持戒行死補天

官升仙自在人雖有王公之位上至帝王死

皆重罪無益鬼神受苦不可堪忍善男子汝

等思惟明奉戒行直心行道吾為汝說天下

萬物無有長存有死有生有成有敗日出則

沒月滿則虧從古至今誰能違返若有道德

不生不滅修善者今月亦善今日亦善今時亦善善善積德諸行修足善念護持今入法寶戒曰

不得盜竊人物

不得妄言綺語

不得貪嗔癡狠

不得呪詛毒心

不得訾毀謗人

不得評人長短

不得毀善自譽

不得毒畜藥人

不得輕慢經教

不得恃威凌物

不得好殺物命

不得殺生淫祀

不得評論師長

不得言人陰事

老君二十七戒

行無為 行柔弱

行無為 行柔弱

行無為 行柔弱

行無名 行清淨 行諸善 右中第三行 行忠孝 行知足 行推讓

行忠孝 行知足 行推讓

右下第三行

此九行二篇八十一章集合為道金尊卑

同科九行備者神仙六行備者壽三行備

者增年

戒勿費用精神 戒勿食含血之物樂其美

色 戒勿傷王氣 戒勿貪寶貨 戒勿忘

道 戒勿為妄動 戒勿枝形名道 戒勿

殺生 戒勿貪功名

右九戒

戒勿為耳目鼻口所娛

戒舉百事詳心勿惚惘

戒勿資身好衣美食

戒勿貪高榮強求

右中九戒

戒勿與人諍曲直得失避之

戒勿欺貪賤強求富貴

戒勿稱聖人大名

戒常當謙讓

戒勿學邪文

戒勿求名譽

戒勿盈溢

戒勿為諸惡

戒勿多忌諱

戒勿強梁

戒勿禱祠鬼神 戒勿自是 戒勿樂兵

右下九戒

此二十七戒二篇共合為道淵尊卑同行
上備者神仙持十八戒備者壽持九戒備
者增年不橫天矣

太上經戒

三洞法服科戒文

三洞弟子京太清觀道士張萬福編錄

力五

天師請閱法服品

太上授道陵三天法師正一真人已乃命雲
宮玉女出九光寶耀蓮冠五色丹羅錦被雲
縠絳文仙褐翔鳳飛錦羽裙七色寶雲錦襪
瑤華藻珠文履碧瑤之笏七寶之函流精華
佩琅英繡璫龍錦坐褥瓊鳳香鑿交龍玉几
斑麟翠拂明光如意十有五種以錫天師天
師冠帶法服五體投地禮拜太上因啓問曰
未審三清上境及諸凡界聖真仙服為有差
降為復等乎愚所未覩願垂分別以示將來
太上曰衣服者身之章也隨其稟受品次不
同各有科儀凡有九等汝可諦聽當為子說
一者大羅法玉元始天尊冠須臾萬變九色
寶冠衣千種離合自然雲被著十轉九變青
錦華裙七明四照參差寶縠五種變化十寶
珠履左右侍真皆悉同然二者玉清法王無
形天尊冠須臾千變七色寶冠衣百變離合
飛雲之被九轉七變翠錦飛縠七明四照流

霞錦縠七寶變化丹雲縠履左右侍真亦復
同矣三者上清法王無名天尊冠須臾百變
五色寶冠衣十種離合流霄之被八轉五變
黃錦霞縠七明四照飛光錦縠五采變化自
然瓊履左右侍真亦復同也四者太清法王
太一天尊冠須臾十變蓮精寶冠衣九種離
合五雲華被七轉四變紫錦羽裙七明四照
玄光丹縠自然變見師子文履左右侍真亦
復同焉五者四梵天中化主無相天尊冠流
精耀日花冠衣玄鳳瑤華之被翠錦丹羽飛
縠五明景雲寶縠飛龍轉變之履左右侍真
亦復同耳又紫被青縠蒼被丹縠綠被絳縠
丹被黃縠黃被素縠絳被龍縠縠悉侍真之服
自四梵以上皆飛雲流霄自然妙氣結成衣
服九色寶光而生萬物長短大小隨境應形
或明光八照圓象洞煥景耀遠近變化自然
或九色合成萬種分輝或龍鳳結彩山水流
形千變萬化不可得名乃至都治城郭宮闕
殿堂樓閣臺榭草木禽獸車輿器物幡幢帳
座種種法具皆是自然應緣而見本無質礙